

գրաւում ու միացնում է բոլոր ուղեւորներին: Հարեւանդ, կամ մանաւանդ Հարեւանուհիդ, որ ի հարկէ աւելի աչքի է ընկնում իր հետաքրքրութեամբ, խաբելով քո արտասանած մի քանի ճապոներէն խօսքերից, անվերջ հարցեր է թափում գլխիդ, թէ ո՞վ ես, ո՞րտեղից եւ ի՞նչ բանի ես:

Ես մեծ ճիգէի գործ դնում մի կերպ տակից դուրս պրծնելու. տալիս էի հիւրանոցիս անունը, արտասանում էի իրար ետեւից իմ անցած քաղաքների շարքը եւ զանազան շեշտերով կրկնում էի ճապոնացու սովորական բացականչութիւնը. «սօ՛ու-դեսկա՛, սօ՛ու-դեսկա՛» գերմաներէն եօ-ի պէս մի բան, որով, նայած արտասանութեանդ եղանակին, արտայայտւում է թէ ուրախութիւն, թէ վիշտ, թէ զարմանք, թէ հարց ու թէ ամեն բան:

Բայց իմ սխալ շեշտադրութիւնս, հարցի ու բացականչութեանս մէջ եղած յաճախ անհամաձայնութիւնը ամբողջ հասարակութեանը մեծ զւարճութիւն էր պատճառում:

Այնպէս որ հին բարեկամներ էինք արդէն, երբ ոտքի ելայ իջնելու համար. խոր ու խոր բարեններով անջատեցինք միմեանցից:

Ճապոնացու պարզութիւնն ու սրտաբացութիւնը մի մասնաւոր հրապոյր է տալիս նրան: Ես գոնէ մի անչափ վստահութիւն ունէի միշտ դէպի նրանք: Մի նոր քաղաք հասնելիս անփոյթ ընկնում էի փողոցները մեն-մենակ, եւ երբէք չեմ զգացած շփոթութիւն կամ երկիւղ, ինչ որ շատ յաճախ զգում է կիներ եւրոպական մի նոր քաղաքում: Ես բացարձակ կերպով համոզւած էի, որ այդտեղ ինձ ոչ ոք չի վիրաւորի, այլ ընդհակառակը՝ պատահած դէպքում ամեն մի անցորդ պաշտպան կը կանգնի:

Սխալւում էի գուցէ, ինչպէս հիմա ասում է ինձ իմ